

Anc pli attractiv ed opticamain preschent sin la viafier e l'auto da posta

L'abunament general grischun BÜGA è dapi l'emprim da favrer 2009 anc pli attractiv: grazia a l'extensiu da l'intschess da collavuraziun sur ils cunfins dal chantun fin a Ragaz Bogn e cun il bus da Silvestri da Zernez fin a Livigno-Pontresina vegnan ils basegns da la clientella resguardads. Sper quest augment d'attractivitat fa er in auto da posta reclama per l'abunament general grischun dapi l'emprim da mars 2009, quai sper la locomotiva dal BÜGA che curescha gia dapi la midada d'urari 2008.

Girada libra fin Ragaz Bogn...

Era l'ultim punct alv sin la charta dal BÜGA è ussa svani. Dapi l'emprim da favrer 2009 pon possessurs d'in BÜGA viagir cun la VFF fin Ragaz Bogn, quai ch'è oravant tut d'avantag per passagiers da Fläsch. Las interpresas da transport cumpigliadas e la partiziun da traffic public dal chantun Grischun satisfan cun questa extensiu ad in grond desideri dals passagiers. L'extensiu è er ina resposta logica a las colliaziuns attractivas da viafier e bus ch'existan cun l'access a la collavuraziun da tariffa «Ostwind» en il Signuradi. Per possessurs dal BÜGA vegnan uschia er ils viadis en la Bassa pli favuraivels – il bigliet da colliaziun sto vegnir cumprà pir a Ragaz Bogn. Quels bigliets pon vegnir retratgs a las staziuns da la VR sco er als automats da bigliets.

... ed a Livign

Il BÜGA è era valaivel en il bus Silvestri da Zernez a Livign (l'entir onn) e da Livign a Puntraschigna (durant la stagiun da stad). Quai mussa ch'il BÜGA è daventà attractiv perfin per il temp liber, cunquai ch'el è era valaivel per in'excursiu a Livign en l'Italia.

Il BÜGA er opticamain preschent sin binaris e vias!

Dapi la midada d'urari il december 2008 gira ina locomotiva marcanta da BÜGA sin ils binaris da la Viafier retica e fa reclama per l'abunament general grischun. Er Auto da Posta mussa ussa «colur» e surpiglia per in auto da posta il design da la marca BÜGA enstagl dal vestgì mellen. Quest auto da posta

curescha principalmain sin las lingias Cuira – Lai e Cuira – Laax ch'èn fermamain frequentadas e fa uschia attent opticamain al BÜGA. Cun questa cumparsa mussa Auto da Posta Grischun che tren e bus sa cumpletteschan significativamain.

Il BÜGA persuade sin binaris, sin via – ed en l'aria!

Il BÜGA è l'entschatta dal 1999 vegnì lantschè da nov dal post chantunal per traffic public e da la Viafier retica. Sper in rabat general èn las schliaziuns naziunalas per abunaments generals da partenari e da famiglias vegnidas surpigliadas, quai che ha rendì la purschida pli attractiva e favuraivla. La valaivladad è vinavant vegnida extendida successivamain sin tut ils partenaris dal traffic public en il Grischun: sper la Viafier retica è il BÜGA era valaivel per l'Auto da Posta Grischun, per il bus da la citad da Cuira, per il bus Engiadina, sin il tschancun da la VFF Cuira–Ragaz Bogn, sin il tschancun da la Viafier Matterhorn Gotthard tranter Mustér ed il pass Alpsura, tar l'interpresa da transport Tavau, per il bus local Claustra-Serneus e perfin per la pendiculara Razén–Veulden. Dapi l'october 2007 pon ins era comprar il BÜGA sco abunament dal mais. Quai ha manà ad in'istorgia da success: l'onn 2000 èn gia passa 2500 BÜGAs vegnids vendids, l'onn 2006 è la marca da 6000 vegnida surpassada, e l'onn passà la marca da 7000 abunaments. La svieuta è s'auzada da 0.57 milliuns francs en l'onn 1998 sin 7.5 milliuns francs en l'onn 2008 – quai èn tresesch giadas dapli che l'entschatta!

Schliaziuns favuraivlas per famiglias

Oravant tut per famiglias e partenaris da tut las sorts che vivan en la medema chasada existan cun las cumbinaziuns BÜGA-Plus schliaziuns favuraivlas per nizzegiar optimalmain la mobilitad en il chantun Grischun cun l'auto da posta, la viafier ed il bus. Saja quai per la via a la lavur u a scola u simplamain per il temp liber.

Vossa furmla da spargnar persunala survegnis Vus a tut ils spurtegls da la Viafier retica e da l'Auto da Posta. Infurmaziuns datti er en l'internet: www.rhb.ch/buega.